

榮縣志



榮縣志

社祀第十一

孔子廟在城北蓮宇山。唐建桂林山。宋乾德三年移近南門。紹興十三年知州孟某遷今所。元末兵燬。明初仍建桂林山。天順元年舉人龔匯請復今處。以三年興工。四年成明倫堂。居仁由義齋。成化四年成大成殿五間。五年作孔子四賢像。八年成東西廡。九年作十哲像。十一年按察使僉憲江陵戴賓以工役未畢命訓導陳源典史周志榮縣人趙昇袁景徽董其事。委敘州經歷龔華治邑計資。十二年戟門櫺星門廚庫成。凡十八年始具。嘉靖中張璉議易木主稱先師而成像不可毀相傳。

塑頭容時。其土取之尼山。往返踰萬里。於虔敬矣。百五十年餘。廟燬。萬歷二十二年。縣人給事中楊鏊知縣程梯。士紳黃紀賢。趙可師。堯可近等。修治之。明倫堂遷殿側。啓聖祠列左。名宦鄉賢祠列右。尋建堂下書樓。補砌兩廡。知縣馬應泰綜其成。教諭羅青訓導吳惟中。黃莪日督之。主簿楊進忠。於泮池前爲屏。典史趙文臣修泮池石欄。知縣朱萬元重葺尊經閣。皆出自俸金。二十八年。知縣樂繼國改建明倫堂。啓聖宮兩廡。尋建奎星樓。在舊禮門三十四年。尊經閣修復。崇禎八年。殿傾牆圯。文昌祠南知縣楊崇忠。教諭劉朝用。改易棖棟。築牆八十六丈。劉

起鳴曹天相募治兩齋。一年竣工。明季之亂。廟事不治。康熙二十一年。六月六日。廟圯。舉人劉世璋以知縣荆喬蕃韓蘊光先後之力。於二十三年成大成殿。規制未備。三十六年。知縣陳大獻建戟門兩廡及名宦鄉賢祠。

四十四年。知縣王澤修明倫堂。

舊學署
臨西街

乾隆十二年。知

縣徐德龍移明倫堂於廟右。奎星閣移櫺星門左。十九年。知縣黃大本捐俸三百餘金。舊觀始復。五十二年。知縣張兆星馬履中龔翼賡新之。凡費二千餘金。時池外有屏甚遠。屏外爲聖門坊。坊外突出爲複牆數十丈。東西建禮門義路二門。荆棘生焉。兩翼又爲民居所扼。嘉

慶十三年。知縣許源募金千餘。移聖門坊於泮池前旁。闢門出入。禮門義路二門。亦上移於聖門坊前。左右障以雲龍石屏。如宮牆式。又繪孔子四子十哲像。濬泮池。新大成殿戟門櫺星門。時稱煥然。道光十八年。以形家言。改癸丁爲子午。接移崇聖門櫺星門奎星閣。十九年。移大成殿大成門東西廡及宮牆泮池甬道。凡費五千餘金。又於明倫堂建寢。東西齋大門甬道。以次畢舉。光緒二十六年。知縣唐選皋修齋宿更衣所。三十年。置樂器。光緒末。西人標廟之右址立教堂。廩生鍾星慶等爭之。乃移清富山孔子向列中祀。宣統元年。升大祀。牆瓦

以黃。故事人入學捐銀二兩曰泮池費。匯爲灑埽會。購置田房。廟事資之。

社稷壇。縣西三里。雍正二年。刊圖頒行。累石爲壇。高二尺一寸。縱橫各二丈五尺四出。陞各三級。繚以短垣。環蔭松栢。四面爲門。飾以丹堊。用石主埋土中。不鐫神號。唐宋制也。外置木主二。高二尺四寸。廣六寸。座高五寸五分。一書社神居東。一書稷神居西。從明制。同壇合祭。不設配位。歲以春秋仲月上戊日致祭。

神祇壇。城外西南。舊名山川壇。嘉慶十六年。奉文更正。製木主三。中曰風雲雷雨之神。左曰本境山川之神。右

曰本境城隍之神。壇制與社稷同。祭亦同日。國變六年。沒其基立蠶桑局。惟於社稷壇舉祭而已。

先農壇東北二里虎洞下。雍正四年。詔直省立先農壇。六年。知縣陳容捐置藉田。七年。知縣王惟淳捐修屋三間。嘉慶中。知縣許源遵會典建廟三楹。立神主。爲夾室。覆瓦砌甃。堊之。繚以牆。前豎照壁。壇如雍正五年圖式。高三尺一寸。廣二丈五尺。主高二尺四寸。廣六寸。座高五寸。廣九寸五分。朱牌金字。祀神農氏。歲以仲春之亥致祭。行耕藉禮。乾隆七年。頒雩祭禮。每歲孟夏擇日常雩。雨暘不時。卽雩於先農壇。

厲壇在北門外。嘉慶五年。知縣席世綢修牆垣柵門。已圯。古有國厲民厲。祭法王祭大厲。諸侯祭公厲。大夫祭族厲。國厲也。士喪禮。疾病禱於厲。民厲也。明洪武三年。定國厲郡厲邑厲。皆設壇城北。以清明及七月望十日朔。城隍主祭。清因其制。俗曰賞孤。

奎星閣二。一在城內文廟櫺星門東。萬歷三十二年建。乾隆中。鄧錫綸等移建於鳳鳴山麓。一在城外東山。光緒二年。知縣徐傳善建。劉炳勛有記。

關岳廟。前關帝廟。國變二年。檄以岳武穆合祀。一曰武廟。在南街桂林街之間。明萬歷時。進士鄖陽巡撫黃紀

賢捐建寢殿。康熙四十五年知縣王澤新之。增東西廡。乾隆十九年。住持吳來應募建樂樓。嘉慶三年。知縣龔異縣人陳利賓募建騎街春秋閣。以關公好左氏傳也。有田二區。一在南關外楊家灣。一在西關外三清殿。國變七年。春秋閣圯賣。

城隍廟。在東街。初在城西。明成化間移今地。隆慶三年。知縣張九思斥廣之。殿寢廊廡具備。乾隆十七年。知縣黃大本建前楹五間。五十三年。知縣張兆星改前楹爲拜庭。重建樂樓兩廡十王殿坊表。道光十四年。士民改修寢殿及左右房室。光緒十七年。知縣唐選皋改新樂

樓兩廡。按城隍者古坊與水庸之祀。隍卽池也。特無水之壕耳。門戶井竈主此者其義狹。至城池則一方之灾祥繫之矣。而城隍之祠始見於孫吳之世。則以佛乘入中國。航海者先至吳。故吳中佛法尤昌。遂以地獄附之意以在人而主此政刑者。城池之君也。在鬼而主此善惡者。城池之神也。近士或以城隍爲蟲蝗轉音。此自清時小學風習耳。至十王云者。據梵漢諸鈔亦各有本地一不動。此明王現於冥途時名秦廣王。司死者初七日。二釋迦。此如來在冥界稱初江王。司二七三文殊。此菩薩在冥途成宋帝王。司三七四普賢。此菩薩在冥界現。

五官王。司四七。五地藏。此菩薩在地獄現閻魔王。司五
七。六彌勒。此菩薩現變成王。司六七。七藥師。此如來在
冥途變泰山王。司七七。八觀音。此菩薩在冥途變平等
王。司百日。九勢至。此菩薩變都市王。司周年。十阿彌陀
此如來在冥途變五道轉輪王。司三回忌。而世容不知。
遂有生爲上柱國。死作閻羅王云者。

火神廟。一曰離明宮。在和義街。初附關廟東北隅。無專
祀。嘉慶九年。知縣許源罷油戶官役。以其財購今地。建
禹王宮。在西街。初在城東南隅。雍正八年。知縣江夏劉
宗賢建。乾隆三十六年。知縣武陵曾承謨改今所。工未

竣嘉慶八年。知縣湘潭許源鍾成之。楚人主祀曰湖廣會館。按湖廣者水匯也。禹生於石紐。蜀祀亦宜。

天后宮。祀莆陽湄州林氏女。歷代神之。胥有封爵。在西街嘉慶閒。曹其春建。閩人主祀。曰福建會館。

南華宮。祀唐大鑒禪師。名惠能。禪宗所稱六祖也。新州人。今肇興府新興縣。在西街。粵人主祀。曰廣東會館。巧聖宮。在西街。祀魯般。百工之宗也。

榮祿宮。在和義街。黔人主祀。曰貴州會館。榮祿宮皆供黑神。黔人祀之尤虔恪。繼見富順坊刻。乃知劉本者富順人。明天順丁丑科進士也。官貴州按察御史。多惠政。

歿而見兆於上。爲民懇恩。上驚寤曰。劉本死久矣。猶乃心民瘼。可授榮祿大夫。爲黑煞福神。由是祠祀徧西南。禮稱有功德於民。神哉。與淫祀異。按鄭珍遵義府志。四川簡州黑神。祀宋州牧李大全。廣西省城黑神。祀平章也兒吉尼。貴州黑神通祀南霽雲。是與俗傳又異。

蕭公廟。祀齊武帝蕭蹟。以其初爲潯陽國侍郎。出爲贛令。江州刺史也。在和義街。贛人主祀。曰江西會館。

范公祠。祀宋范鎮。在桂林街。今廢。

武聖宮。在桂林街。秦人主祀。曰陝西會館。

文昌宮。在鳳鳴山。乾隆四十三年。知縣符兆熊由萬壽

寺左遷此。蓋宋嘉祐寺址。寺僧祖元開此君軒。元符初。黃山谷過戎州。祖元馳謁山谷。以東坡醉翁操示元。元欣然曰。往歲從成都通判陳君頥得其譜。遂促琴彈之。詞與聲相得也。山谷爲題此君軒詩。載集中。祖元姓王氏。周彥從兄也。晉宋間學佛者皆稱道人。尊之則師。則公。名其堂曰霜鐘堂。以能彈蔡邕秋思琴曲也。建中靖國元年。正月。山谷在江安。贈元師詩。遂東下。崇寧四年九月。山谷卒。縣人於鳳鳴岡北爲祠祀之。曰太史祠。嘉祐寺元末燬。明宣德初重建。清嘉慶六年。文昌列祀典。八年。知縣許源增飾文昌。因建此君軒於寺。蓋卽太史。

祠址矣。歲爲試士之所。咸豐六年。升中祀。科舉罷。爲學堂。按文昌第五星。周禮大宗伯以禋燎祀者也。第六星曰司祿。世士以爲掌祿籍。宜祀學官。歧矣。及晉梓潼神以鐵如意與姚萇成戰功。而末流有化書之作。歧之又歧矣。姑記嘉祐寺之故址。而詳其遷變云。

龍神祠。在鳳鳴山麓。道光二十年。知縣胡澐募建。同治九年。知縣馬佩玖設龍門書院。草書題榜。有孫過庭法。國變。市人毀之。

萬壽寺。蓮宇山左。清爲朝賀行禮之地。殿後有藏經閣。乾隆末。知縣龔巽命鄒正鵬劉純修倡募修補。國變十

四年中學堂自西街移此。

武侯祠在清富山。道光九年知縣宮鑑桂建。唐劉兼詩。諸葛荒祠古木寒。則榮州唐時已有武侯祠。不必錦江也。

張公祠。祀成都張萬祿。張以同治庚申扞賊豹子山殉難。繪像祠之。威遠吳孝廉天成賦長歌。中云豹子山頭兵不利。諸君壁上等兒戲。男兒死耳復何尤。但言未報今皇帝。一時傳誦。

胡公祠在鳳鳴山左。明四川布政使陳瑋記。正德丙子。巡按御史熊相以胡公奏。嘉靖丁酉。按察使薛甲謀於

巡按御史金燦。改葺前巡按御史熊爵所建九峯山書院。爲公專祠。以公弟山東僉事志遠女金奴從祀。而榮無祀。後十餘年。知縣王夢魁以士民請。巡按御史鄢懋卿。乃檄夢魁祠如九峯。舊名耿忠。茲改曰崇仁。時督學陳塋致文遙祭。地在東門外曹家街。今穀神祠。萬歷初。知縣王建元新其祠宇。與教諭石磬訓導陳時敏率諸生請學使陳文燭爲碑。製迎神送神曲。併設崇仁書院。清書院廢。乾隆時。知縣黃大本遷明倫堂左。咸豐三年。胡氏請於龍神祠隙地專祠。知縣姚寶銘寢其議。光緒十八年。知縣唐選皋始建今祠。明士夫題詠或俚。茲錄